



SENTENCE ARBITRALE

Entre les Religieux de l'Abbaye saint Vincent de Senlis :

Et Messire Iean Philippe de Berthier, Abbé de ladite Abbaye.

VEV PAR NOVS CHARLES PREVOST, sieur de S. Germain & de Venues en partie, Conseiller du Roy en sa Cour de Parlemēt : Le compromis passé le dix-sept Avril mil six-cent cinquante-quatre, pardeuant Corrozet & le Boucher, Notaires au Chastelet de Paris, entre Messire Iean Philippes de Berthier, Conseiller du Roy en ses Conseils, Abbé de l'Abbaye de saint Vincent de Senlis, d'une part : Et Frere Thomas Cliquot, Prestre Religieux en l'Abbaye de sainte Genevieve au mont de Paris, ayant charge & pouvoir des Religieux Prieur & Conuent de l'Abbaye de saint Vincent de Senlis, à l'effet dudit compromis, auxquels il promet le faire ratifier & en rapporter l'acte de ratification, d'autre. Par lequel compromis lesdites parties pour vuider & terminer les procez, instances, & differents qui sont entre eux pendans & indecis, tant au Parlement, Requestes du Palais, Conseil Priué du Roy, Grand Conseil, & autres Iurisdiccions, pour raison des choses mentionnées esdits procez, instances & differends, tant civil que criminel, circonstances & dependances : Nous auroient nommé & conuenu pour leur Arbitre, arbitrateur & amiable compositeur, & à nostre Iugement arbitral, auroient promis respectiuement acquiescer comme si c'estoit Arrest de Cour souveraine, à peine de payer par le contreuenant la somme de quinze cent liures tournois, payable à l'acquiesçant auparavant que d'estre receu à dire ny proposer aucune chose contre ladite sentence arbitrale, à l'effet duquel iugement lesdites parties promettoient mettre en nos mains les memoires, tiltres, & papiers, dont ils s'entendoient aider dans le vingt-deux Avril, pour sur icelles rendre nostre iugement arbitral dans le dernier iour dudit mois d'Avril ledit iour includ, & pour les actes qui seroient à faire en execution d'iceluy : comme aussi pour l'execution de ladite sentence arbitrale, & prononciation d'icelle, lesdites parties auroient fait election de domicile irreuocable en cette ville de Paris : Sçauoir ledit sieur de Berthier en la maison de Maistre Michel Millet le ieune, Procureur en Parlement, scize rue saint Martin Parroisse saint Nicolas Deschamps, & ledit Frere Cliquot audit nom, en la maison de Maistre Pierre Iurandon aussi Procureur en Parlement, scize rue de l'Irondelle Parroisse saint André des Arts. Acte du huit Mars mil six-cent cinquante-cinq, passé pardeuant ledit Corrozet & le Boucher, Notaires audit Chastelet de Paris, par lequel lesdites parties auroient prorogé ledit compromis iusques au dernier May includ, pour estre lesdits differents iugez par nous arbitre susnommé, sous les conditions & peines contenuës audit compromis. AVTRE acte du treize dudit mois de Mars audit an mil six-cents cinquante-cinq, rapporté par ledit Frere Cliquot, passé pardeuant de saint Leu & Fortier Notaires Royaux à Senlis, par lequel les Religieux Prieur & Conuent de ladite Abbaye de saint Vincent de Senlis ont ratifié ledit com-

A



promis du dix-sept Avril mil six-cents cinquante quatre. AUTRE acte du vingt-neuf dudit mois de May audit an mil six-cents cinquante cinq. passé pardevant ledit Corrozet & le Boucher, Notaires audit Chastelet de Paris, par lequel ledit sieur de Berthier & ledit Frere Cliquot audit nom ont encore prorogé ledit compromis jusques au quinze Juin inclus. TRANSACTION passée entre ledit sieur de Berthier d'une part, & ledit Frere Cliquot audit nom, d'autre, pardevant ledit Corrozet & le Boucher Notaires audit Chastelet de Paris, le huitième Juin audit an mil six-cents cinquante-cinq, pour raison des bastiments & differents enoncez en icelle, sans prejudice aux parties des autres differends qu'elles ont ensemblement, & dont nous sommes arbitre, lesquels seroient par nous jugez conformément audit compromis.

1. VEU aussi premièrement l'instance pendante & indecise au Parlement, entre les Religieux Prieur & Conuent de ladite Abbaye de saint Vincent de Senlis, appellans de la sentence rendue par le Bailly dudit Senlis ou son Lieutenant, le dix-sept Avril mil six-cents cinquante-deux d'une part, & ledit sieur de Berthier Abbé dudit S. Vincent intimé d'autre, ladite sentence du dix-sept Avril mil six-cents cinquante-deux, rendue par ledit Bailly de Senlis entre lesdites parties, par laquelle au principal elles sont renuoyées au Parlement pour estre réglées; & cependant par provision ordonne que ledit sieur de Berthier distribuera es mains des Directeurs des pauvres Enfermez de saint Lazare dudit Senlis, ce qu'il doit de reste des huit muids de bled suiets à estre distribuez aux pauvres, par l'Arrest du Parlement du treize Juillet mil six-cents trente, & ce en la presence de deux Religieux de ladite Abbaye de saint Vincent, & à ce deuement appellés, tous despens, dommages & interrests reservez. Production dudit sieur de Berthier sur ledit appel, ensemble les pieces & memoires desdits Religieux Prieur & Conuent dudit saint Vincent.

2. LA REQUESTE desdits Religieux Prieur & Conuent dudit saint Vincent par eux présentée au Parlement le quinzième Fevrier mil six-cents cinquante-trois, tendant à ce que ledit sieur de Berthier soit condamné, leur rembourser les sommes qu'ils ont esté obligés de payer pour les taxes extraordinaires des decimes pareux aduancées, responce dudit sieur de Berthier à ladite requeste, memoire & pieces desdits Religieux.

3. LE PROCES par écrit pendant au Parlement, conclud & receu pour iuger entre lesdits Religieux Prieur & Conuent de saint Vincent de Senlis, appellans de la sentence rendue par Messieurs des Requestes du Palais, le vingt-huit Mars mil six-cents cinquante d'une part, & ledit sieur de Berthier intimé d'autre, ladite sentence du vingt-huitième Mars mil six-cents cinquante, rendue entre Frere Laurent Puleu, Prestre Religieux Profex de ladite Abbaye de saint Vincent, deservant les trois prebendes de Nostre Dame de saint Rieul & saint Frambour dudit Senlis, appartenans à ladite Abbaye, demandeur & deffendeur d'une part, & ledit sieur de Berthier & lesdits Religieux Prieur & Conuent de saint Vincent deffendeurs & demandeurs d'autre: Par laquelle sur la demande dudit Puleu, afin d'augmentation de six-cents livres de pension, les parties ont esté mises hors de Cour & de procez: Et en consequence sur la sommation dudit sieur de Berthier à l'encontre desdits Religieux, les parties sont pareillement mises hors de Cour & de procez. Enjoint audit Puleu de resider dans le Conuent dudit saint Vincent, ou autre lieu dependant d'iceluy, & lesdits Religieux condamnés à faire deservir lesdites Prebendes par luy ou par autre, à peine de tous despens, dommages, & interrests, sans despens. Production desdits Religieux faite ausdites Requestes du Palais, Grieffs par eux fournis au Parlement sur l'appel de ladite sentence, & autres pieces.

4. L'INSTANCE pendant ausdites Requestes du Palais, entre ledit sieur de Ber-

3

thier demandeur aux fins de l'exploict du douzième Avril mil six cents cinquante-deux d'une part, & lesdits Religieux Prieur & Conuent de Senlis deffendeurs d'autre : Ledit exploict du douzième Avril mil six cents cinquante-deux, portant assignation ausdits Religieux ausdites Requestes du Palais, à la requeste dudit sieur de Berthier, pour se voir condamner se desister & departir d'une piece de prez scituée en la prairie de Senlis, derriere l'Eglise saint Estienne de Senlis, lieu dit la Falaize, & luy en delaisser la libre possession & iouissance, comme faisant partie des heritages à luy delaissez par la partition des biens de ladite Abbaye, avec restitution des loyers au dire de gens à ce connoissans, depuis ladite detention : Deffences desdits Religieux, production dudit sieur de Berthier, memoire & pieces desdits Religieux.

5. **EXPLOICT** du vingt-troisième Mars, à ce que lesdits Religieux de saint Vincent soient tenus de monstrier & exhiber les titres en vertu desquels ils iouissent du lieu, maison, & iardin cy-devant possédé par Claude Imbert, pour ce faire prendre telles conclusions que ledit sieur de Berthier auiſera bon estre : La requeste du vingt-septième Avril mil six cents cinquante-deux, faite ausdites Requestes du Palais par ledit sieur de Berthier en adioustant à sadite demande, à ce qu'après ladite exhibition de titres lesdits Religieux soient cōdamnez luy payer les cens & rentes deus pour ladite maison, comme estant de la censue de ladite Abbaye, lots & ventes, droits de main-morte & indemnité, à cause de l'acquisition qui en a esté faite par lesdits Religieux, & en l'amande, pour n'auoir ce fait dans le temps porté par la coustume, production dudit sieur de Berthier, memoires & pieces desdits Religieux.

6. **LA REQUESTE** présentée par ledit sieur de Berthier au grand Conseil, en consequence de la sommation du dixième Avril mil six cents cinquante-trois, le quinzième Decembre audit an, à ce que lesdits Religieux Prieur & Conuent dudit saint Vincent fussent condamnez se desister & departir de douze arpens & demy de terre en six pieces scizes au terroir de Barbery, Montespilloüier & Balagny, pour estre reunie au domaine de la portion dudit sieur de Berthier & ses successeurs Abbez, comme en ayant esté separée depuis la partition, avec restitution de fruits, ou les loyers au dire de gens à ce connoissans depuis la detention; Et en cas que lesdites terres ayent esté aliénées par les Abbez, predecesseurs dudit sieur de Berthier, pour subuentions, & que lesdits Religieux les ayent retirez, les condamner les delaisser audit sieur de Berthier à l'effet de ladite reunion, en leur remboursant le principal de ladite alienation, frais & loyaux cousts d'icelle, & à cette fin ordonner que lesdits Religieux representeront quittances de finance & autres actes, autrement condamnez à restituer les fruiets & reuenus desdites terres, & en faire le delaissement avec despens, dommages, & interets : production dudit sieur de Berthier, memoire & pieces desdits Religieux.

7. **L'INSTANCE** entre ledit sieur de Berthier appellant du iugement rendu par les Maistres particuliers des Eauës & Forests dudit Senlis, le quatorzième Mars mil six cents cinquante-quatre, d'une part, & les Religieux Prieur & Conuent dudit saint Vincent intimez d'autre, par lequel il est dit que le procez verbal de mesurage du troisième Fevrier mil six cents cinquante-quatre, sera deliuré ausdits Religieux : Et neantmoins faisant droit sur la demande incidente dudit sieur de Berthier, ordonne qu'il sera procedé à nouveau mesurage de la piece de bois en question, en presence du Iuge du Procureur du Roy, & des parties, lesquelles pour cet effet conuendront d'arpenteurs, sinon seront nommez d'office, & auant proceder à iceluy & au laiage, ledit sieur de Berthier sera tenu indiquer ausdits Arpenteurs les bornes & marques de ladite piece de bois, pour par lesdits Religieux contester ou en demeurer d'accord, & de tout estre dressé procez verbal despens reservez, & le memoire & pieces

4

mis pardeuant nous par lesdits Religieux.

8. L'INSTANCE pendante au Parlement renuoyée par Arrest du Conseil, entre le dit sieur de Berthier, appellant de la sentence renduë aux Requestes du Palais le vingt-neufième Avril mil six-cents cinquante d'une part, & lesdits Religieux Prieur & Conuent dudit saint Vincent intimez d'autre: Ladite sentence dudit iour vingt-neufième Avril mil six-cents cinquante, entre lesdits Religieux Prieur & Conuent dudit saint Vincent, demandeurs en requeste, tendant à ce que ledit sieur de Berthier fut condamné leur payer vnze muids huit mines de bled meteil, & cinq muids dix mines d'auoine, pour les arrerages de sept années de trente mines de grain par chacun an, à eux deus par ledit sieur de Berthier, & les arrerages de cent douze liures aussi à eux deus pour leur vin, & pour seureté qu'il leur fust permis saisir, d'une part, & ledit sieur de Berthier deffendeur d'autre, par laquelle sentence il est ordonné que les deniers saisis leur seront baillez & deliurez iusques à la concurrence des arrerages desdites redeuances, & à ce faire vider leurs mains, les debiteurs contrains par toutes voyes deuës & raisonnables, quoy faisant déchargez, & ce nonobstant oppositions ou appellations quelconques, & sans preiudice d'icelles: Ensemble les pieces & memoires desdits Religieux.

9. LA COMMISSION de la Cour du vingt huitième Mars mil six-cents cinquante quatre, obtenue par lesdits Religieux Prieur & Conuent dudit saint Vincent, pour y faire assigner ledit sieur de Berthier, pour se voir faire deffences de les troubler dans la ceremonie pratiquée & vstée dans leurs Monasteres de leur Congregation es Festes solennelles, telles que le Prieur desdits Monasteres, & autres qui celebrent l'Office esdits iours, prennent place en la premiere chaire à main gauche, & vis à vis celle de l'Abbé Commendataire, laquelle chaire est ornée de tapis & coussins violets: L'exploict du vnze Avril ensuiuant, portant assignation à la Cour audit sieur de Berthier, pour y répondre aux conclusions portées par ladite commission: Acte du troisieme dudit mois d'Avril, par lequel ledit sieur Berthier declare ausdits Religieux qu'il n'entend les troubler aux fonctions & ceremonies ordinaires qu'ils ont accoustumé faire en leur seruice; Mais proteste de s'opposer aux nouueautez extraordinaires & inusitées, memoires & pieces desdits Religieux, sommation audit sieur de Berthier de mettre ses pieces & memoires en nos mains, & autres pieces & memoires des parties: Et apres auoir oüy par plusieurs fois ledit sieur de Berthier, & ledit Frere Cliquot pour lesdits Religieux Prieur & Conuent de saint Vincent de Senlis sur lesdits differends: tout considéré.

Au nommes
au Parlement
au rapport de
M. Laisné.

1. NOVS FAISANT DROIT sur l'appel de la Sentence du Bailly de Senlis, du dix-septième Avril mil six-cents cinquante-deux, METTONS l'appellation & ce dont a esté appellé au neant, emendant: ORDONNONS que conformément à la Sentence dudit Bailly de Senlis du vingt-quatrième Mars mil cinq-cens quatre-vingts treize, & à l'Arrest de la Cour du treize Iuillet mil cinq-cens trente, executé par ledit sieur Abbé, iusques au quinzième Mars mil six-cents cinquante-deux, il fournira ausdits Religieux Prieur & Conuent de saint Vincent, chacun an de quartier en quartier & par aduance, la quantité de huit muids de bled meteil, pour estre employé aux aumosnes qui seront faites à la porte de ladite Abbaye par lesdits Religieux, auxquelles ledit sieur Abbé pourra assister ou enuoyer si bon luy semble. CONDAMNONS ledit sieur Abbé payer ausdits Religieux Prieur & Conuent, les arrerages desdits huit muids de bled, depuis le dernier dudit mois de Mars mil six-cents cinquante-deux, qu'il a cessé de les payer, en iustificiant par lesdits Religieux auoir fait lesdites aumosnes ordinaires, & affirmant par le Pere Procureur de leur Monastere le distributeur desdites aumosnes, lesdits huit muids de bled meteil auoir esté entie-

rement consommées esdites aumosnes : Et en cas qu'ils ne l'ayent esté, ordonnons conformément à la declaration desdits Religieux inserée en la sentence dudit Bailly de Senlis du treizième Avril mil six-cents cinquante-deux, que le restant d'iceux sera par eux baillé à l'Hospital des Pauvres Enfermez dudit Senlis.

2. ET SUR la requeste desdits Religieux Prieur & Conuent dudit saint Vincent, du quinzième Fevrier mil six-cents cinquante trois, CONDAMNONS ledit sieur Abbé rembourser ausdits Religieux les sommes qu'ils ont esté obligez de payer pour les taxes extraordinaires.

Taxes extraordinaires au Parlement au rapport de M. Laisné : & retenu en icelles par Arrest contradictoire au rapport de M. Barou.

3. ET SUR L'APPEL interietté par lesdits Religieux Prieur & Conuent dudit saint Vincent, de la sentence renduë par Messieurs des Requestes du Palais, le vingt-huitième Mars 1650. mettons l'appellation & ce dont a esté appellé, au neant : Emendant, Disons que lesdits Religieux fourniront audit sieur Abbé un ou plusieurs Religieux de ladite maison de saint Vincent, pour deseruir les Prebendes, auxquels sera payé pension par chacun an par ledit sieur Abbé, selon qu'il sera conuenu entre ledit sieur Abbé & lesdits Religieux commis à deseruir ou ordonné par Iustice.

Pour la deservie des Prebendes. Au Parlement au rapport de Monsieur Palluau.

4. ET SUR la demande dudit sieur Abbé portée par l'exploict du douzième Avril mil six-cents cinquante-deux, touchant les cinq arpens de pré, AVONS mis les parties hors de Cour & de procez.

Les prez. Aux Requestes du Palais au rapport de Monsieur le Bonli.

5. ET SUR les demandes dudit sieur Abbé, portées par l'exploict du vingt troisième Mars mil six-cents cinquante-deux, & requeste verbale du vingt-septième Avril audit an. ORDONNONS que lesdits Religieux bailleront coppie audit sieur Abbé de la Sentence du Bailly de Senlis, du dix-neufième Novembre mil six-cents quarante-deux, en vertu de laquelle ils sont rentrez en possession de la maison & heritages scizez aux faux-bourg saint Estienne dudit Senlis, luy payeront les arrerages de seize sols parisis de cens à luy deus pour lesdites maisons & heritages, continueront à l'aduenir à peine de l'amande coustumiere, & sur le surplus mettons les parties hors de Cour & de procez.

Le droit d'indemnité. Aux Requestes au rapport de Monsieur Barantim.

6. ET FAISANT DROIT sur la requeste presentée au Grand Conseil par ledit sieur de Berthier, le quinzième Decembre mil six-cents cinquante-trois, ORDONNONS que lesdits Religieux Prieur & Conuent dudit saint Vincent, se departiront de la possession des douze arpens & demy de terre ou environ, par eux retirez du sieur Loyfel, en payant par ledit sieur Abbé la somme de deux-mil deux-cents liures payée par lesdits Religieux audit sieur Loyfel, suivant la Sentence du Bailly de Senlis du vingt-fixième Octobre mil six-cents quarante-neuf affirmant par les Peres Bernard Calgnet & Charles Hochart leur Prieur, & Procureur de ladite Abbaye de S. Vincent, ladite somme auoir esté entierement payée audit Loyfel, & faisant par eux cession de leurs droicts & actions audit sieur de Berthier, sans autre guarentie que de leurs faits.

Les terres aliénées. Le retrait fait par Sentence du Juge de Senlis.

7. ET SUR l'appel interietté par ledit sieur de Berthier de la sentence du Bailly de Senlis du quatorzième Mars mil six-cents cinquante-quatre, mettons l'appellation & ce dont a esté appellé, au neant : Disons que conformément à l'Arrest du Parlement du vingt-troisième Aoust mil six-cents cinquante-deux, lesdits Religieux Prieur & Conuent dudit saint Vincent sont maintenus & gardez en la iouissance de quarante arpens de bois mesure de roy, dont sera fait mesurage & bornage en presence des parties, ou icelles deuement appelez à communs frais par Iurez Arpenteurs, dont icelles parties conuiendront, autrement pris d'office par l'executeur du present Iugement : A cette fin seront tenuës respectiuelement les parties monstrier les bornes, separations, & entre-deux des bois dont par cy-deuant lesdits Religieux ont iouy, & d'icelles conuenir auant qu'il soit procedé audit mesurage.

Les bois. Au Parlement en execution d'un Arrest rendu au rapport de M. Lebrez.

Les cent douze
liures dix
sols & trente
mines de grains
Au Parle-
ment au rap-
port de Mon-
sieur de Refuge,
renuoyé en ice-
luy par Arrest
du Conseil.

8. ET SUR L'APPEL interietté par ledit sieur de Berthier de la sentence renduë par Messieurs des Requestes du Palais le vingt-neufième Avril mil six cents cinquante, auons mis l'appellation aueant. ORDONNONS que ce dont est appel sortira son effet: Ce faisant ledit sieur Abbé condamné payer ausdits Religieux Prieur & Conuent dudit saint Vincent, les arrerages de cent douze liures dix sols, & de trête mines de grain qu'il est obligé leur payer chacun an, suiuant la partition faite entre les Abbez & Religieux dudit saint Vincent de Senlis, & les Arrests mesme celuy du septième Septembre mil six-cents cinquante-deux. A cette fin les deniers saisis és mains des Fermiers dudit sieur Abbé, seront baillez ausdits Religieux iusques à la concurrence de leur deu.

Les Ceremo-
nies.
Au Parle-
ment au roole
de Paris.

9. ET EN ce qui concerne la demande desdits Religieux Prieur & Conuent dudit saint Vincent, portée par la commission de la Cour du vingt-huitième Mars mil six-cents cinquante-quatre, & exploict du onzième Avril ensuiuant: DISONS que les ceremonies seront faites en l'Eglise de ladite Abbaye de saint Vincent de Senlis, selon l'usage ancien & accoustumé, auant l'année mil six-cents cinquante-trois: Et pour les nouuelles pretenduës deuoir estre faites depuis l'année mil six-cents cinquante-trois, se pouruoiront lesdits Religieux pardeuant Monsieur l'Euesque dudit Senlis les deffences dudit sieur Abbé au contraire: le tout sans despens. Fait & prononcé audit sieur de Berthier au domicile par luy élu à Paris en la maison dudit Millet Procureur en Parlement, à son Clerc. Et audit Frere Cliquot à sa personne, pour lesdits Religieux Prieur & Conuent dudit saint Vincent de Senlis, le quinziesme iour de Iuin mil six-cents cinquante-cinq, & les pieces renduës aux parties.

Ainsi signé, PREVOST.

Signifie & baillè coppie de la presente Sentence par moy Huiſſier Sergent à verge au Chastelet de Paris sous-signé, audit sieur de Berthier y desnommé: au domicile par luy esleu en la maison de Maistre Michel Millet le ieune, Procureur en Parlement, scize rue S. Martin, en parlant à Iean le Maire son Clerc, le dix-huitième iour de Iuin mil six-cents cinquante-cinq. Et baillè coppie tant de ladite Sentence que du present exploict, presens Iean Camus & Claude de la Marre.

Signé LE CONTE.





